

Cun structurass professiunalas

Il Surselva Skiteam ellas davoss preparativas

DA GIUSEP VENZIN / ANR

■ Igl unviern vargau han ils skiunzs dil Surselva Skiteam nudau ina victoria suenter l'otra. Als campiadis grischuns organisai dalla Gruppa da cuorsa Arena Alva al Crap S. Gion han ils atlets trenai da Selina Fravi gudignau 25 medaglias. El slalom gigant dils buobs U16 ein ils emprems quater stai skiunzs dil Surselva Skiteam. Ellas retschas dil cader sursilvan ein era entgens skiunzs d'ordeifer. In da quels ei *Fadri Janutin* da Landquart. Il d'origin da Surses frequenta la scola da talents Surselva e separticipescha allas cuorsas sco commember dil Club da skis Sursaiassa. El ha gudignau igl unviern vargau pli u meins tuttas cuorsas ella categoria U14. Ulteriurs skiunzs d'ordeifer frequentan la scola da talents Glion che fuorma ensemen cul Surselva Skiteam in center da prestaziun da Swiss Ski. Dils 29 sportists actualmeins alla scola da talents Surselva ein 19 d'ordlunder. Da quels ein siat skiunzs. Buca tuts ein commembers dil cader da skis sursilvan. Ils curriders da cuorsa liunga ein buca schi stedi alla scola da talents Surselva. Actualmeins frequentan dus la scola a Glion. Omisud ein dalla vischnaunca Ilanz/Glion e frequentassan aschia ni aschia la scola a Glion. Cautrenader dils curriders da cuorsa liunga ei *Gion Antieni Maissen* da Trun. El meina in cader da 20 atlets. Pils success da sia truppa igl unviern vargau han *Severin Bonolini*, *Chiara Arpagaus* e *Lena Kropf* procurau.

80 000 pass

Per *Selina Fravi* ha il bien spert d'equipa gronda muntada. Per promover quel ha ella fatg cun ses atlets l'entschatta dalla stad ina tura da dus dis ed absolviu enteifer 15 uras 80 000 pass. La tura cun sacados ha menau da Glion sur l'Alp da Brün a Tenna ed il secund di sur la Fuorcla da Gün anavos a Duin. In auter eveniment ei stau il camp da cundiziun a Cuolm Sura. Cun quella caschun ha la truppa fatg ina viseta alla academia da freestyle a Laax. Leu han ils skiunzs saviu observar co *Elias Ambühl* fa sias piruetas. Il skiunz dalla Tumliasca ei in dils megliers dil mund en siu sport.



Selina Fravi dalla Val Schons trenescha il secund unviern ils skiunzs dil Surselva Skiteam.

La trenadra dalla Val Schons catta sustegn da *Pius Berni*, da *Reto Casutt* e da *Patrick Pally*. Quels treneschan ils atlets da cader a Sursaiassa, a Laax ed a Sedrun.

Cullas experientschas fatgas igl emprem onn vul *Selina Fravi* midar ina ni l'otra caussa igl unviern proxim. Aschia vul ella trenar dapli liber. Quei trenament vul ella en scadin cass porscher als scolars dalla scola da talents Surselva. Quels ein numnadameins treis tochen quater ga per jamna sin pista, ils skiunzs che frequentan la scola els vitgs san buca prestar quei. Il success dils scolars dalla scola da talents als campiadis ei allura era pli gronds. Als campiadis grischuns a Laax ha la trenadra dumbrau inclusiv la cumbinaziun 25 medaglias da ses atlets. 17 ein da scolars dalla classa da talents. «Ruassar sillas arbagias sai jeu denton buca», constatescha *Selina Fravi*. Il program da trenament ei consequentameins era buca fatgs per sportists ch'ei cuntents cun success vargai.

Treis dis en tenda

Il zercladur ha *Gion Antieni Maissen* clamau ses atlets als emprems trenaments. Ina jamna extraordinaria han quels allura frequentau la stad ell'Engiadina Aulta.

Equipai cun sacados e tenda ein els i ellas muntognas aultas ad in camp da surviver. La plievgia ed il freid han been spuentau els anavos ella civilisaziun suenter treis dis, mo il trenader e collaboratur da Swiss Olympic ei tutina dil meini che quei camp seigi staus d'avantatg ed hagi formau ils giuvenots. In auter camp han ils curriders da cuorsa liunga absolviu ensemen cul cader dall'Engiadina Aulta a Feldkirch. *Gion Antieni Maissen* ha trenau ils Engiadines avon ch'el ei turnaus en Surselva.

Igl unviern proxim astga el buca sefidar dils success da *Severin Bonolini*. Quel ha midau tier ils juniors e leu ei enconuschentameins pli grev da contonscher success igl emprem onn suenter la midada. Cun *Chiara Arpagaus* e *Lena Kropf* ha el denton vinavon duas buobas U16 che vegnan a procurar per in ni l'auter success.

Niev coordinatur dalla squadra nordic ei *Andrin Caviezel* da Domat. Il fischer cun dimora a Parpan ei il fegl digl anterior cautenader *Balzer Caviezel*.

Ils gronds success mauncan

Malgrad las structurass professiunalas dil Surselva Skiteam e l'integraziun dalla scola da talents Surselva eisi buca gar-



Gion Antieni Maissen da Trun ei il cautenader dils curriders da cuorsa liunga.

FOTOS G. VENZIN

tegiu als skiunzs da s'anzar a la gronda ils davos ogt onns. Actualmeins ein sulet *Carlo Janka* e *Christian Spescha* da Sursaiassa commembers d'in cader da Swiss Ski e quei dapi il 2004 respectiv il 2006. Era els han profitau dil trenament el Surselva Skiteam. Las structurass eran avon ogt onns aunc buca schi professiunalas. Actualmeins ein treis Sursilvans ed anteriurs scolars dalla scola da talents Surselva commembers dil cader dalla Svizra orientala, numnadameins *Marco Gämperle* da Flem, *Yannick Caduff* da Falera e *Rafael Berther* da Tujetsch.

Dalla truppa dils curriders da cuorsa liunga ha *Livio Bieler* da Panaduz contonschiu avon treis onns il cader da Swiss Ski ed ei leu actualmeins el cader B. El ei commember dil Club da skis Trin. Dus ulteriurs commembers dil Club da skis Trin – *Serafin* e *Till Wiestner* – ein en caders nazionals da biatlon.

Cader Alpin

U14: *Bianca Flutsch*, Gruppa da cuorsas dalla Arena Alva; *Matia Coray*, Ruschein; *Nico Pally*, Sedrun.

U16: *Noemi Caruso*, Mundaun; *Melanie Cavigelli*, Sursaiassa; *Selina Tomaschett*, Mustér; *Kim Manetsch*, Mustér; *Viviane*

Wellinger, Arena Alva; *Ivo Arpagaus*, Padrus; *Matteo Arpagaus*, Ruschein; *Dominic Cadruvi*, Ruschein; *Dario Janki*, Sedrun; *Markus Schuster*, Sursaiassa; *Marc Walther*, Sursaiassa; *Mike Winzap*, Sursaiassa; *Lars Caduff*, Arena Alva; *Nils Halter*, Mundaun; *Fadri Janutin*, Sursaiassa; *Andrin Veraguth*, Arena Alva.

Juniors: *Lea Oechlin*, Sursaiassa; *Sven Brasser*, Sursaiassa; *Dario Tönz*, Val. Juniors commembers dil cader grischun: *Janine Caduff*, Arena Alva; *Didier Cado-nau*, Mundaun; *Tgasper Darms*, Mundaun.

Cader nordic

U14: *Julian Deplazes*, Sedrun; *Svenja Tomaschett*, Trun; *Ursin Telli*, Trin; *Andriu Decurtins*, Trun; *Fadri Nay*, Trun; *Fadri Schmid*, Sedrun; *Cla-Ursin Nuffer*, Sedrun.

U16: *Chiara Arpagaus*, Sagogn; *Sina Cavelti*, Sagogn; *Lena Kropf*, Trun; *Alessandro Cadalbert*, Sevegin; *Noah Malin*, Sevegin; *Maurus Telli*, Trin.

U18: *Severin Bonolini*, Castrisch; *Manuel Hännny*, Castrisch; *Lara Hartmann*, Cuera; *Dario Cavelti*, Sagogn; *Maurizio Cavelti*, Trun.

U20: *Valeria Cavelti*, Trun; *Mattias Manetsch*, Trun.

Premis pigl auto decorau all'Ex14



■ (cp) Dils 24 entochen ils 26 d'october ha l'EX14 giu liug a Mustér. A caschun da quella ha il Center da formaziun Surselva menau atras ina concurrenza da malegier. Tier quella concurrenza ei vegniu malegier sin in auto ed ils maletgs artistics silsuenter vegni publicai sin facebook. Sin fundament dils «likes» sin facebook ein ils victurs vegni erui. Ils 30 d'october 2014 ha la surdada dils premis giu liug. *Curdin Tuor*, meinafatschenta dil Center da formaziun Surselva, ha saviu gratular als victurs (rang 1-4). Gudignau han *Xenia Riedi*, *Danis* e *Nicoline Janka*, *Rueun*, skis da Freestyle (sponsur *Menzli Sport*), in Surface Tablet (sponsur *Nervenschoner*) ha *Loriana Mognetti* (maunca sil maletg), *Rabius*, gudignau, uregliers da *Bang & Olufsen* (sponsur *Expert Surselva*) ha *Damian Allenspach*, *Schluein*, gudignau ed uregliers cun capetscha (sponsur *Expert Surselva*) ha *Adriana Deplazes*, *Camischolas*, gudignau. Pils rangs tschun entochen 14 ei vegniu surdau bons per in abbonament dil bus da notg *Steila Surselva* (sponsur *Regiun Surselva*).

MAD

DESERTINA BULLS

Duas terradas per ils Bulls

La tierza runda da campiadis ella 3. ligia dils umens ha giu liug a Trimmis. Ils Bulls han giugau encunter las equipas dad *Aschera (Schiers)* ed *Appenzell*. Per ils Bulls era ei naven dall'entschatta clar ch'ei vegni grev da prender cun els puncts a casa. Tutina ein ils da Mustér i cun gronda motivaziun els dus giugs encunter ils secunds ed ils quarts dalla tabella.

Ils Wildcats dad *Aschera* han beinspert fatg clar tgi ch'ei il schef sil plaz. Cun ils pass e siets precis dils adversaris ha la defensiun dils Bulls giu naven dall'entschatta gronda breigia. Denton han ils Bulls era fatg grev la veta a sesezs cun biars sbagls ed inexactadads. Era las biaras paradads da *Flavio Schuoler* han buca saviu migliurar il clar resultat.

UHC Wildcats Schiers – UHC Desertina Bulls 9:0

Suenter la terrada encunter l'equipa dad *Aschera* han ils Bulls vuliu mussar ina buna reacziun encunter *Appenzell*. Cun ina midada dil sistem han ils Bulls entschiet quei secund giug. La midada ha purtau fretg ed ils giuvens da Mustér han saviu stabilisar lur defensiun. Da pausa menava l'equipa dalla *Bassa* cun 2:0. Ella secunda mesadad han ils Bulls retschert entgens castitgs ed aschia buca saviu tener il stretg resultat. Tutina ha la presta-

ziun el secund giug fatg speronza e gust sin ils proxims giugs.

UH Appenzell II – Desertina Bulls 6:0

Per la giuvna equipa ein giugs encunter fermes adversaris ina buna experientscha e muossan nua e co ei sto ir vinavon el futur. Malgrad ils dus resultats clars vegnan ils Bulls pli e pli datier als emprems puncts. L'egliada ei ussa drizzada sin la proxima runda da campiadis a Sargans.

Bulls cun: *Flavio Schuoler* (goli), *Florian Venzin* (goli), *Andreas Huonder*, *Rico Bearth*, *Arno Pfister*, *Andri Nay*, *Silvan Giger*, *Severino Giger*, *Remo Bundi*, *Joey Manetsch*, *Livio Cajoche*, *Dominik Deflorin*, *Dario Schuoler*, *Adrian Flepp* e *Florian Zanin* (trenader). *Andri Nay*

CORRIGENDA

Acabellos e «Gaglira»

(anr/sr) Il gliendisdis ha La Quotidiana rapportau davart il niev disc compact «Gaglira» dils *Acabellos*. En quei connex havein nus publicau ina concurrenza e leu ei deplorablameins in sbagl seslutaus viaden. Il batten dil disc ei secapescha sonda ils 8 da november. E buca sco publicau venderdis, ils 8 da november. Perstgisei.